



## 燈籠花和板葉樹

燈籠花啊！板葉樹！成過生到滿哪位，現時嘎硬討無無去。較早，莊頭莊尾个細子絞伴絞陣絞絞歸大汪，對莊頭絞到莊尾。毋係跋樹，無即透當晝打赤膊跔著溝墜行，手擎樹乳瓣、抑係細枝竹篙膏著打馬膠去射蟬、黏蟬，無即瞞爺惑哀走去泔水、摸蚬子、捉老蟹。

毋過，較多時間係在竹頭下个石餅面上抑係掘起來个棺樵枋面上辦家貨。屋下底有麼个壞去个傢伙頭，攏做一下會提來利用。論起用頭多个植物，遐即係愛算板葉樹和燈籠花囉。板葉樹和燈籠花在遐個年代係種到滿哪位都有。佢人攏有靚靚个花蕊，尤其係花蕊中央攏有一枝紅紅个花芯。細子人真愛捋佢來辦家貨，用佢來漆手甲，學大人拗手甲漆到紅紅紅。

捋板葉樹葉當做鑊、當做盤、當做碗。燈籠花葉做菜，擎著壞煎匙認真在遐煮飯炒菜。學大人講事，講天講地、晝天晝地，講著會擎天擎地，心肝像牛肱恁大。有時務嘛會拗燈籠花提來插在頭那嶼抑係耳脣，學大人化妝。嘛會拗樹葉當做錢，一皮一皮算，緝做一拿一拿，像開銀行，愛錢自家印，得人脛著心色攏好笑。

燈籠花大部分攏係種來做圍籬用，毋使起遐冷冷攏愛開錢个磚牆。花開个時，蝶嘛得佢錫錫來，鳳蝶、樺斑蝶、黃蝶、白蝶逐種有，有時務嘛有幾下隻蜂飛來鬥鬧熱。細子人毋驚半件，用手去拍去捉，不時得蜂注免費个預防射，後擺即較毋會感著啊！

板葉樹會用做風圍，保護家園，樹葉會用提來鋪板底。炊出遐一床床味素特別个板。無樵个時嘛想著佢，佢大了真緊，不時有通裁來炙燥燻火，生命力嘛真強，毋驚散地、鹽分，樹樞落泥即攏活一頭新樹，插樞嘛會活。熱天時，佢係老儕、細子歇涼个好所在，嘛係蟬愛歇个跡位。

燈籠花，遐細子探手即捋會著个葉恰花，和偲人做伴到大漢。細子、狗仔、貓仔在遐鑽過來鑽過去，留下幾多童年个歡樂和天真。這兜點點滴滴攏記在偲人這代人个心肝底。若講討選出頭會用代表客莊个花，佢相信燈籠花和板葉樹係頭好个代表。

作者：李秉璋

### ☆詞彙學習☆

- |   |  |
|---|--|
| 【燈籠花】den` lung` fa`：朱槿花。                  | 【棺樵枋】guan` cio` biong`：棺材板。                  |
| 【板葉樹】ban` rhiab` shi：黃槿樹。                 | 【晝天晝地】fa teen` fa ti：說誇大不實的話。                |
| 【絞伴絞陣】gau` pan` gau` chin：呼朋引伴，成群結黨攏和在一起。 | 【擎天擎地】kia` teen` kia` ti：翻天覆地，喻本領高強，有顛覆天地之能。 |
| 【歸大汪】gui` tai` bbong`：一大群。                | 【風圍】fung` bbi`：防風用的圍籬。                       |
| 【樹乳瓣】shi nen` piag`：彈弓。                   | 【燻火】lung` foo`：燒火。                           |
| 【瞞爺惑哀】man` rhia` foo` oi`：欺瞞父母。           | 【探手】tam` shiu`：伸手，把手伸長。                      |
| 【石餅】sha piang`：石板。                        |  |